



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliarvm Omnivm Generalivm Et Provincialivm Collectio Regia

Ab anno CCCCLI. ad annum CCCCLXXV.

Parisiis, 1644

LIX. Epistola Episcoporum Novæ Epiri, Ad Leonem Imperatorem. Piissimo
& Christi amantissimo, a Deo principe constituto, victori, triumphatori,
semper Augusto Leoni, Lucas episcopus, Artemius, ...

urn:nbn:de:hbz:466:1-14887

EPISCOPORVM NOVÆ EPIRI,

AD LEONEM IMPERATOREM.

Piissimo & Christi amantissimo, a Deo principe constituto, victori, triumphatori, semper Augusto Leoni, Lucas episcopus, Artemius, Antonius, Philocharis, Eusebius, Nazarius & Paulus episcopi Epiri.

RELEGENTES ea quæ nobis a vestra tranquillitate sunt scripta, & agnoscentes mox inter ipsa principia non solum pro fide catholica sanctarum ecclesiarum, sed pro ciuitate quæ sub vestri imperii sceptro dinumeratur, tantam vos habere sollicitudinem, quantam oportet gerere diuino nutu Romana imperia conscendentem, & tranquille omnia gubernantem, vt vndique totius orbis terrarum inconcussa & sine fluctu sit nauis; maximas gratias saluatori nostro Iesu Christo debere nos confitemur, orantes pariter, vt Christianum nobis vestrum imperium multis temporibus conseruetur, quod nobis & singulis vtique, & pariter vniuersis spes maximas & demonstrat & donat. Decet enim & simul & singularim vniuersos, quasi de quodam pectoris nostri cubiculo bona vestra proferre, quorum prima & maxima est, pacis utilitas. Relegentes igitur oblatas vobis preces ab Alexandrinis, in malorum tempestate maxima constitutis, & agnoscentes scelera a dæmone ibi commissa, amarissime in his ingemiscetes, & propria membra lugentes, quæ tali calamitate noscuntur afflicta; paululumque respirantes, & communem de his rebus tractatum habentes omnes episcopi in vestra Epiro constituti, secundum ea quæ a vestra tranquillitate sancita sunt, hæc vestris piis auribus indicamus: gratias primitus etiam in hoc agentes, quoniam parentes nostris infirmitatibus atque laboribus, & maximam propter hiemis vehementiam nostri solenniter curam habentes, præcipitis vt singuli nostrum in regione propria de præsentibus rebus suam debeant proferre sententiam. Quapropter dicimus, quod si ea quæ ab Alexandrinis in accusatione deducta sunt, cum veritate

concordant, (non enim ex vna parte verba suscipienda sunt) nec ordinatio Timothei firma consistit, & ab episcopatu, quem arripuisse dicitur, est penitus alienus. Si autem oportet eum sermonem satisfactionis in presentia vocatum præbere pro his quæ commisit, sicut & conuenit, & iustum simul & pium est, si etiam vestræ tranquillitati complacet, vt secundum petitiones supplicum nihil ab eo in medio tempore aduersus fidem catholicam penitus innouetur, cum præcipue imperator piæ memoriæ Marcianus deponendos esse fanciuerit etiam recte factos episcopos, si quid mutilare aut commouere ex his quæ Calchedone a sancto & vniuersali Concilio sunt definita, tentauerit, sicut ipsa monumenta ibi confecta testantur, in quibus quoddam signaculum definitionibus, memorati principis sanctio supposita est. Ea vero quæ Calchedone constituta sunt a sancto & vniuersali Concilio de fide catholica, in quantum doctrinas & expositiones & interpretationes perfectorum patrum nostrorum sequi valuimus, esse consona iudicauimus his quæ Nicææ a sanctis trecentis decem & octo patribus definita sunt, & postea in regia ciuitate a centum quinquaginta patribus explanata, in quibus etiam perduramus. Et licet plurimis sermonibus extendatur expositio fidei catholicæ Calchedone celebrata, tamen ad illas respicit, quarum in præcedentibus probatur fuisse memoria, & veluti paucarum illarum est interpretatio syllabarum. Si quis igitur sobrie ac fideliter, & non contentiose de his voluerit cogitare, in tantorum decretis consentit, quorum etiam multus numerus ad satisfactionis sufficit rationem. Non enim in verbo fidei omnium vnanimiter potuit sententia conuenire, nisi sanctus Spiritus illic pro causa veritatis interfuisset. Cum ergo grandia sint hæc quæ mota noscuntur, & egeant vestræ Christianitatis auxilio, supplicamus tantis malis resistere, & rebus inoptabilibus repugnare. Dignumque vestra pietate trophaum cum superno solatio contra diabolum confidenter erigite, flammam hanc, antequam in sublime conscendat, extinguite: languoremque priusquam velut morbus inficiat vniuersa, curate. Nam medicorum ægritudines curantium illos potius admiramur, qui neque ad ægritudinem venire

Sup. cap. 12.

ANNO
CHRISTI
451

permittunt. Non patiaris horum scelerum cumulum fieri posteris in exemplum: habeant loca sancta proprium cultum, ecclesie inuiolabile securitatis ius, pontificisque cauetela baptisteria purgentur a nece. Dele iam, venerabilis imperator, impietatis monumenta: doceantur omnes pietatis exercere culturam.

Lucas episcopus Dyrrachenus. Incolumem semper in omnibus modis pium vestrae serenitatis principatum multis in pace temporibus Dominus Christus conseruare dignetur, Deo amabilis, victor & triumphator Auguste.

Artemius episcopus Escampenus, similiter.

Antonius episcopus Lychnidii, similiter.

Philocharis episcopus Vallidi, similiter.

Eusebius episcopus Apolloniadis, similiter.

Nazarius episcopus Aulonæ, similiter.

Paulus episcopus Prinatenus, similiter.

LX.

EPISTOLA

EPISCOPORVM CRETÆ,

AD LEONEM IMPERATOREM.

*Piissimo imperatori, & Christo amabili domino, Augusto Leoni,
Martyrius humilis episcopus vestrae Gortynæ.*

TEMPVS nobis est lyram sumere diuinitus inspirati psalmistæ Dauid, principatu tranquillitatis vestrae. Ille namque solus idoneus est hymnus piæ vestrae magnitudini proferri, in quo ait: *Saluum fac Domine regem, & exaudi nos.* Et iterum in aliis modulationibus dicit: *Domine in virtute tua letabitur rex, & in salutari tuo exultabit vehementer;* & reliqua quæ in ipso psalmo sunt, pro vestrae potentiae ordinatione dicta creduntur. Sciens enim ex illo tempore gestorum talia prophetarum, quia per quæ confirmatis ea quæ Dei sunt, per ea quoque vestrum roboratis imperium. De his autem quæ nos vestra fanciuit pietas iudicare, ego & mei confacerdotes recte consistentes insinuauimus, quia sanctum Calchedonense Concilium concordare credimus expositioni fidei trecentorum decem & octo patrum in Nicæa vrbe congregatorum, in qua baptizati & baptizantes, & prolatum exinde omnibus

Locus mutilus.